



Senin, 19 Agustus 2024

Ogen: 1 Kronika 28:21



"Merincuh Nampati"



Merincuh nampati e me sada biak si arus lit i bas teptep kalak Kristen; sabap biak nampati enda pe jadi biak i bas diri Tuhan Jesus Kristus. Tuhan Jesus ncidahkan biak nampati i bas pelayanen si ilakokenna ope ia nangkih ku Surga. Si oge bas Pustaka Si Badia maka melala kal ituliskan kerna biak Tuhan si nampati. Nampati kalak musil, nampati lako mpepalem kalak si pinakiten, nampati lako nehken pergegeh man kalak si medanggal baban geluhna, nampati kalak si lalar perdalanna bage pe nampati kalak lako ngidah kuasa Tuhan i bas geluhna. Menam kerina si idahiken Tuhan Jesus Kristus i bas geluhna e me nampati.

Nampati kalak labo terjeng materi saja. Dikune lit teman perlu kal ingan nuri-nuri, e maka sisiakpken waktu bage pe pusuhta lako megikensa e me enggo ikataken nampati; dikune lit teman i bas kearun ate dengen ragu i bas muat keputusan jenari ikut kita muat bagin lako erbahan pertimbangan-pertimbangan ope ibahanna keputusenna e pe nggo ikataken nampati; dikune lit teman jenari sekolah sura-sura anakna tapi la ietehna ise si banci nampati ia, kita lit teman sitandai guna nampati ia banci kita jadi penghubung, e pe i kataken nggo nampati. Artina gelah ula terfokus saja kita ku materi adi ateta nampati temanta manusia. Tetaplah pebelin biak lako merincuh nampati alu la ngarapken balasen arah kalak si isampati kita. Sabap nggo kurang kal gundari biak nampati alu tulus i bas diri jelma, kerina ngarapken imbalen adi lit jelma si atena isampatina.

Jadi sada kerihen min bas kita adina banci kita nampati teman-temanta bage pe jadi sada keriahen min bas kita adina lit kalak mindo penampat man banta. Sipakekenlah kegeluhenta alu mereken penampat man kalak si perlu penampatta sabap Tuhan si sembah kita e pe mereken geluhNa nampati kita.